

2022-23 年度「積金好僱主」嘉許計劃嘉許典禮
暨「市道復常-機遇與挑戰」分享會

2023 年 10 月 4 日

發言重點

強制性公積金計劃管理局主席

劉麥嘉軒女士

1. 咁多位嘉賓，大家好！我想同大家講一個故事。呢個故事嘅主角係陳太。佢白手興家，好勤力工作，儲到筆錢開咗間餐廳，自己做老闆。佢間餐廳啲嘢好好食，唔單止係咁，佢班夥計出晒名招呼好，所以無論係本地人定係遊客都好鐘意去。
2. 但係好景不常，全球突然爆發一場世紀大疫症，冇人敢去街，遊客就更加唔見晒。陳太佢呢間餐廳本來日日排晒長龍，突然間無晒食客。最慘嘅就係冇人估到疫情會持續幾耐。陳太睇到佢周圍啲餐廳一間一間執笠。佢都問自己：我係咪都要裁員呢？
3. 但係佢諗返起咁多年嚟，都係有賴佢一班夥計肯同佢拼搏，佢盤生意先做到咁好。所以陳太決定，要同班員工一齊面對呢個困難嘅時刻。
4. 佢叫晒班夥計嚟想辦法，有人建議減工時、放無薪假，又有人建議將餐廳嘅特色菜改良，做高檔嘅三餸飯，專攻外賣，又有人負責去申請政府嘅保就業計劃。咁陳太嘅一家人就搬咗去一間細啲嘅屋，慳返啲開支用嚟出糧。總言之，佢哋都係抱住同一個目的，就係幾艱難都要捱過呢一關！
5. 終於，疫情過去，市面恢復正常，啲食客返嚟。因為陳太冇裁員，班夥計好感激佢，個個做嘢更加落力，而餐廳嘅生意比疫情前更加好。

6. 陳太呢個故事係咪有啲似曾相識呢？無錯，我哋今年每一位嘅「積金好僱主」好可能都有類似陳太呢個故事。特別係經過呢三年嘅疫情，大家都係對員工有情有義嘅好僱主，你哋珍惜員工過去嘅付出，又兼顧佢哋今日嘅需要，更加照顧埋佢哋將來嘅福利，包括佢哋嘅退休保障，就好似我哋今年嘅主題一樣，「僱現在，顧未來」。
7. 我哋今個年度嘅積金好僱主嘉許計劃，其實大部份時間都係喺疫情之下渡過，不過我哋仍然有超過 2,100 位僱主獲得嘉許，破咗以往嘅紀錄，每一個積金好故事未必一樣，但係你地嘅理念係相同嘅：就係要盡力幫你哋嘅僱員做好佢哋嘅退休保障。
8. 強積金係一個透過僱主同僱員雙方共同努力嘅退休保障制度。僱主可以好好利用呢個制度，去增強你哋員工嘅退休保障，例如提供多個強積金計劃畀員工選擇，或提供額外嘅自願性供款。好快，你哋就有機會「升呢」做一個「好上加好」嘅積金好僱主！因為我哋喺下年第二季開始，就會推出「積金易」平台。我哋嘅目標，係要為全港嘅打工仔女，同埋全港嘅僱主打造一個「好用、易用、你哋個個都會鍾意用」嘅數碼化行政平台。各位僱主，無論你係用緊邊一個受託人提供嘅計劃，你哋都可以通過積金易平台，一站式咁處理晒你哋僱員嘅強積金工作，你哋咪可以慳返啲時間，慳返啲資源。我喺呢到呼籲咁多位僱主，請你哋記住密切留意推出嘅時間，請你哋配合即時登記，同你哋嘅員工一齊享用呢個全新嘅數碼化「積金易」平台。
9. 最後，我想請大家以掌聲恭賀我哋今個年度嘅積金好僱主。多謝各位。